

CAVORETTO - TORINO 9 1 1921

Honorato domino Barral,

Me recipe cum gaudio notitias de vos, per medio de Spinx. Me preca que vos adverte me si habitatione de vos Rue Gioffredo Nice, es exacto, ut me pote publica tabula de socios. Vos non debe contributione novo, nam vos jam mitte illo in 1920.

Me lege cum interesse scripto de vos langue internationale; rationes que vos explica es justo, et me desidera que socios de Academia cognosce illos. Ergo me preca que vos publica uno opusculo, ubi vos expone ideas de vos super lingua internationale. Isto opusculo pote es extracto de Sphinx. Affirmatione de vos super similitudine de interlinguas es multo importante, sed debe es demonstrato ad publico, que crede esperanto ido neutral etc. toto differente inter se.

Esperanto es nomen commune de plure systema, vocabularios non es concorde Saussure, jam editore de Scientia Revuo, es excommunicato, etc.

Interlingua significa "lingua internationale, et es nomen commune de omni forma. Me scribe in latino sine flexione. Omni socio de Academia adopta forma de interlingua que illo praefer, et linguas de socios resulta plus simile inter se quam esperanto et ido. Idiom neutral es constructo ab Rosenberger, directore de Academia in 1893- 1908 circa et mortuo in 1918, sicut resulta ex meo ultimo circulare. Universal es lingua de Molenaar, socio actuale de Academia. Me lege cum facilitate esperanto, et plus facile ido, neutral universal, sed me non es in casu de scribe illos, que es lingua personale. Ex unione de ce linguas personale resulta lingua definitivo. Ita in omni lingua nationale existe varietate de stylos, et etiam de orthographia. Academia hebe etiam publicato scriptos in Volapúk, post 1909, in Esperanto Ido, etc. Vos pote dic:

un des dialectes connus de la langue universelle publiés dans l'Academia pro Interlingua. Si expensa de publicatione de articulo, que vos mitte ad omni socio, es magno, vos pote inscribe amicos de vos socios de Academia, sine mitte quota sociale ad thesaurario. Et vos pote constitue sectione de Academia, libero ad omni opinione .

Salutationes cordiale.